

Refurma da rentas – giuvens e dunnas han ditg na

Retschertga da la Tamedia sunter la votaziun

■ (sda/anr) La refurma da rentas è tenor ina retschertga ida da l'aua giu per vi da la resistenza dals votants giuvens e da las dunnas. Ultra da quai han votants sin la champagna votà auter ch'en la citad. 84 pertschient dals votants da la pps e 61 pertschient dals votants da la pld han mess in na en l'urna, quai mussa ina retschertga da Tamedia ch'è vegnida publicada ier. Tar ils simpatisants da la pcd n'han dus da tschintg votants betg suandà la parola da partida e votà na. Tar la ps ed ils verds han radund 25 pertschient dals votants refusà la refurma. In maletg sumegliant è d'observar tar la finanziaziun supplementara da l'AVS.

Giuvens e dunnas refusan la refurma

Betg reussì èsi als aderents da la refurma da persvader las dunnas. Mo 42 pertschient han beneventà il project da refurma. Avessan mo ils umens votà avessan omadus projects cuntanschì ina maioritad dal pievel. Il project da refur-

ma fiss dentant passà mo per pauc cun 51 pertschient.

La differenza tar las duas schlattainas stoppian ins interpretar sco opposiziun da las dunnas encunter l'auzament da la vegliadetgna da rentas, scrivan ils auturs da la retschertga.

Era tar ils giuvens ha il project fatg naufragi: Sulet 43 pertschient dals votants tranter 18 e 34 onns han beneventà la refurma e l'auzament da taglia sin plivalur. Cleramain pli ferm è stà il sustegnimant tar persunas sur 50 onns. Ils pensiunads han acceptà la refurma cun 53 pertschient.

Puspè citad cunter champagna

La retschertga ha plinavant mussà in foss tranter citad e champagna. Las citads han beneventà l'auzament da la taglia sin plivalur e la refurma cun 55 pertschient, resp. 52 pertschient. Sin la champagna è l'acceptanza stada cun 47 pertschient, resp. 43 pertschient, pulit pli bassa.

Ina buna accoglientscha ha la refurma da rentas cuntanschì tar persunas cun ina scolaziun universitara: 63 pertschient dals academichers han ditg gea. Votants che han fatg in emprendissadi u in diplom da commerzi èn stads pli sceptics: 60 pertschient han votà na.

La refurma da rentas è vegnida refusa da sorprendentamain a moda clera la dumengia passada. 52,7 pertschient dals votants han ditg na al project da lescha. La midada da constituziun che fiss stada necessaria per auzar la taglia sin plivalur è vegnida sbittada mo cun 50,1 pertschient. Er ina maioritad dals chantuns n'han ins betg cuntanschì.

Dumandà passa 10 000 persunas

A la retschertga èn sa participadas 10 050 persunas. Lur respostas han evaluà ils politologs *Lucas Leemann* e *Fabio Wasserfallen* tenor variablas demograficas, geograficas e politicas. Sco sbagli maximal da retschertga inditgeschan els 1,7 procents.



La giuventetgna e las dunnas han procurà per in na a la refurma da rentas ch'è stada en votaziun la dumengia passada. KEYSTONE